



### ЕЛ ДАМУЫНЫҢ ДРАЙВЕРІ

5-БЕТ | ҚАЛА МЕН САЛА



### ОҚУШЫ СӨМКЕСІ АУЫР МА?

7-БЕТ | БІЛІМ



### ОРМАНДЫ НЕГЕ ОТ ШАЛДЫ?

11-БЕТ | ЖАСЫЛ ҚАЗАҚСТАН



Қасым-Жомарт ТОҚАЕВ,  
ҚАЗАҚСТАН РЕСПУБЛИКАСЫНЫҢ ПРЕЗИДЕНТІ:

Біз бүгін алдағы реформалардың бағыт-бағдарын айқындап алдық. Енді мемлекетімізді және қоғамның барлық саласын жаңғырта түсуге тиіспіз. Саяси реформалар «Күшті Президент – ықпалды Парламент – есеп беретін Үкімет» формуласымен жүзеге асырылып жатыр. Бұл тұжырым – қоғамымыздың мызғымас тұғыры.

№106  
(4384)

Бейсенбі  
8 қыркүйек  
2022 жыл



# ASTANA



РЕСПУБЛИКАЛЫҚ ҚОҒАМДЫҚ-САЯСИ ГАЗЕТ

A Q S H A M Y

1990 ЖЫЛҒЫ 13 ҚАЗАННАН БАСТАП ШЫҒАДЫ



## ЖҰМЫЛА КӨТЕРГЕН ЖҮК ЖЕҢІЛ

«Қостанай, біз біргеміз!» қайырымдылық шарасы аясында елордалық Қазақстан халқы Ассамблеясы өрттен зардап шеккен Қостанай облысының тұрғындарына 40 тонна гуманитарлық көмек жіберді. Қазір елдің әр өңірінде Қостанай облысындағы алапат өрт салдарынан баспанасыз қалған отбасыларды қолдау мақсатында арнайы штабтар құрылып, қаржылай және заттай көмек көрсетуде. Сауапты іске елордалықтар да белсенділік танытып жатыр.

3

### 12 ЖЫЛДА 2 ЕСЕ КӨБЕЙДІ

Ұлттық статистика бюросының мәліметі бойынша республикалық маңызы бар қалалардағы халық саны айтарлықтай өсті.

2021 жылғы санақ қорытындысы негізінде жинақталған деректерді қайта есептеуден кейін 2022 жылғы 1 тамыздағы жағдай бойынша қалалардағы тұрғындар санының көрсеткіші мынадай болды: Нұр-Сұлтан – 1 328 535, Алматы – 2 135 365 және Шымкент – 1 179 045 адам.

2009 жылғы санақ қорытындысы бойынша елордада 619 мың адам тұрған.

Ал 2021 жылғы санақтың нәтижесінде Нұр-Сұлтан қаласы тұрғындарының саны екі есеге артып отыр.



### «АХМЕТ БАЙТҰРСЫНҰЛЫ 150 ЖЫЛ» МОНЕТАСЫ

Қазақстан Ұлттық банкі АНМЕТ БАЙТҰРСЫНҰЛЫ. 150 ЖҰЛ коллекциялық монетасын айналымға шығарды.

Монетаның бет жағындағы орталық бөлігінде Қазақстан Республикасының Мемлекеттік Елтаңбасы бейнеленген. Елтаңбаның сол және оң жағында ұлттық ою-өрнек элементтері орналасқан. Жиегінде айналдыра – QAZAQSTAN ULTTYQ BANKI • NATIONAL BANK OF KAZAKHSTAN деген жазу бар. Монетаның төменгі бөлігінде номиналын білдіретін жазу бар: күмістен жасалған монетада – 500 TENGE, мельхиор қоспасынан жасалған монетада – 100 TENGE.

Монетаның сырт жағында Ахмет Байтұрсынұлының плакаттық графика стилінде орындалған портреттік бейнесі орналасқан.



## ИНВЕСТИЦИЯ ТАРТУДЫ ТАПСЫРДЫ

Мемлекет басшысы Қасым-Жомарт Тоқаев «Астана» халықаралық қаржы орталығының басқарушысы Қайрат Келімбетовті қабылдады. Президентке «Астана» халықаралық қаржы орталығы жұмысының қазіргі нәтижелері, сондай-ақ Мемлекет басшысының маусым айында АХҚО-ны басқару жөніндегі кеңестің отырысында берген тапсырмаларының орындалуы туралы есеп берілді.

Қайрат Келімбетовтің айтуынша, АХҚО-да әлемнің 65 елінен 1500-ден аса компания тіркелген. Тартылған инвестицияның жалпы көлемі 6,9 миллиард долларға жеткен. Astana International Exchange (AIX) биржасы арқылы 321 миллион доллардан астам акционерлік капитал және 2,1 миллиард дол-

лар қарыз капиталы тартылды. АХҚО соты мен Халықаралық арбитраж орталығы жалпы 1200-ден астам даулы мәселені қарастырған.

Сонымен қатар Мемлекет басшысына Экономикалық ынтымақтастық және даму ұйымының (ЭЫДҰ) жуырдағы есебінде АХҚО-ның салық режимі

салық ашықтығының жаһандық стандарттарына сай келеді деп танылғаны жөнінде мәлімет берілді. Қасым-Жомарт Тоқаев елдің экономикалық дамуында «Астана» халықаралық қаржы орталығы маңызды рөл атқаратынын атап өтіп, шетелдік инвестиция тарту жұмыстарын күшейту қажет екенін айтты.

## ҚҰРЫЛТАЙҒА ДАЙЫНДЫҚ БАРЫСЫН БАЯНДАДЫ

Мемлекет басшысы Қасым-Жомарт Тоқаев Парламент Сенатының төрағасы Мәулен Әшімбаевты қабылдады. Президентке 14-15 қыркүйекте елордада өтетін Әлемдік және дәстүрлі діндер көшбасшыларының VII съезіне дайындық туралы мәлімет берілді.

Парламент Сенатының төрағасы, Съезд хатшылығының меңгерушісі Мәулен Әшімбаев дінаралық форумға 50-ден аса елден 100-ден астам делегация келетінін жеткізді. Аталған жиынға Рим Папасы Франциск, Эл-Азхардың Жоғарғы имамы шейх Ахмад ат-Тайеб және басқа да діндер көшбасшылары қатысады деп жоспарланып отыр.

Сенат төрағасының айтуын-

ша, алдағы іс-шара әлемдік бұқаралық ақпарат құралдарының қызығушылығын тудырып отыр. 200-ден астам шетелдік және 300-ден астам қазақстандық БАҚ өкілдері аккредитациядан өткен. Съезд аясында Декларация қабылданады. Бұл қорытынды құжат форумға қатысушылардың өркениетаралық және конфессияаралық, сондай-ақ жаһандық дамудың өзекті мәселелеріне

деген ұстанымын білдіреді.

Президент қазіргі жағдайда съезд өткізудің маңызы жоғары екеніне тоқталды. Қасым-Жомарт Тоқаев жаһандық диалог мәдениетін ілгерілету қажеттігін және Қазақстанның осы үдеріске қатысуы маңызды екенін атап өтті. Сонымен қатар Мемлекет басшысына Сенаттың алдағы уақытқа арналған жұмыс жоспары баяндалды.

## ЫНТЫМАҚТАСТЫҚ НЫҒАЯДЫ

Мемлекет басшысы Қасым-Жомарт Тоқаев Германияның экономикалық делегациясын қабылдады.

Кездесу барысында Қазақстан мен Германия арасындағы сауда-экономикалық және инвестициялық ынтымақтастық мәселелері талқыланды. Мемлекет басшысы Германия Үкіметі мен бизнес өкілдеріне ілтипат білдіре отырып, еліміз энергетика, өнеркәсіп, ауыл шаруашылығы, көлік және логистика, білім, ғылым және техникалық бағыттағы кадрларды даярлау сияқты негізгі салалар бойынша серіктестікті тереңдетуге мүдделі екенін атап

өтті. Қазіргі уақытта Үкімет 800 әлеуетті инвестициялық жобадан құралған жобалар пулын әзірледі. Сондай-ақ Қазақстан Германия компанияларын елімізге тарту үшін қолайлы жағдай жасауға дайын.

«Германия – Қазақстанның Еуропа Одағындағы ең маңызды серіктесі. Қазақстанда Германия капиталының үлесі бар 600-ден астам кәсіпорын табысты жұмыс істеп жатыр. Сауда-саттықты арттырып,

инвестиция көлемін ұлғайту үшін мол әлеует бар» деді Қасым-Жомарт Тоқаев. Сонымен қатар Президент Германияның техникалық мамандықтар бойынша кадр даярлау тәжірибесіне қызығушылық білдірді. Атап айтқанда, Қазақстан отандық мамандардың деңгейін көтеру үшін Германияның техникалық институттары өкілдіктерін, зертханаларын, ғылыми және құзырет орталықтарын ашу мүмкіндігін қарастырып жатыр.

## КОМПАНИЯНЫҢ ӨЗЕКТІ МӘСЕЛЕСІН ТАЛҚЫЛАДЫ

Президент Қасым-Жомарт Тоқаев «АрселорМиттал» компаниясы басқармасының атқарушы төрағасы Лакшми Митталды қабылдады.



Кездесуде «АрселорМиттал Теміртау» компаниясының Қазақстандағы қызметінің өзекті мәселелері мен алдағы уақытқа арналған жоспары талқыланды. Сондай-ақ өндірісте қауіпсіздікті қамтамасыз ету, жергілікті тұрғындарға әділ еңбекақы төлеу, әлеуметтік міндеттемелерді орындау және материалдық-техникалық базаны жаңғырту мәсе-

лелері әңгіменің арқауына айналды.

Мемлекет басшысы компанияның аталған талаптар мен міндеттемелерді орындауы аса маңызды екенін айтты. Сонымен қатар Президент ішкі нарықтың қажеттілігін «АрселорМиттал Теміртау» кәсіпорнының өнімдерімен өтеу мәселесіне мән берді. Бұдан бөлек, компанияның

парниктік газ шығарындыларын азайту шараларына да назар аударылды.

Лакшми Миттал Қасым-Жомарт Тоқаевқа жуық арада «АрселорМиттал» компаниясы Қазақстанға 1 миллиард доллар көлемінде инвестиция құятынын, оның басым бөлігі өндірісті жаңғыртуға бағытталатынын жеткізді.

## ҚАЛАНЫҢ ШЕТ АЙМАҒЫ ҚАЛАЙ ДАМЫП ЖАТЫР?

Елордадағы абаттандырылған аудандар мен елді мекендердің арасындағы теңсіздікті жою үшін жүйелі жұмыс жүргізіліп жатыр. Бұл туралы Нұр-Сұлтан қаласының әкімі Алтай Көлгінов мәлім етті. Елді мекендердің даму барысы туралы қала басшысы әлеуметтік желідегі парақшасында жазды.

«Қаламыздың әрбір төртінші тұрғыны елді мекендерде, яғни елорданың шеткі аймақтарында тұрады. Абаттандырылған аудандар мен елді мекендер арасындағы теңсіздікті жою үшін жүйелі жұмыс жүріп жатыр. Түйткілді мәселелердің бірі – инженерлік желілер. Қаланың елді мекендерінде 50 шақырым инженерлік желі салынды, оның ішінде 11 шақырымы – көріз, 20,7 шақырымы – сумен жабдықтау желісі, ал 3 шақырымнан астамы – нөсер көрізі. Быыл тағы 10 шақырым инженерлік желінің құрылысын аяқтаймыз» деді қала басшысы.

«Елді мекендерді жеке-жеке аралап, жергілікті тұрғындармен кездесу өткіземіз. «Кирпичный» тұрғын алабының тұрғындарымен кездестім. Осыған дейін қала тұрғындары оқу орындарына байланысты, нақтырақ айтқанда, №12 мектеп бойынша мәселе көтерген болатын. Бұл мектеп осыдан

60 жыл бұрын салынған, қазір апатты жағдайда, ал ішіндегі құрылымдары жарамсыз күйде тұр. Оның ғимаратын бұздық, қазір орнына жаңа, жайлы мектеп салу жұмысы басталды. Мектепті 2023 жылы салып бітіруді жоспарлап отырмыз. Сол сияқты жеке инвестор есебінен балабақшаның құрылысы жүріп жатыр. Бұдан бөлек, Чехов көшесіндегі (Байқоңыр ауданы, Кирпичный елді мекені) апатты үйлердің тұрғындарымен кездестім. Ондағы үйлердің бір бөлігін (барақтар) 2024 жылы бұзылатын ғимараттар тізіміне енгіземіз. Бейнебақылау камераларын орнату, жол мәселесі, аула клубтары, абаттандыру секілді түрлі проблемалар қозғалды. Бұл мәселелерді жүйелі түрде шешуді қолға аламыз» деп сөзін жалғады А.Көлгінов.

Қала әкімінің айтуынша, елді мекендер жекеменшік сектор болғандықтан, 680 шақырым газ тарату желісі

салынды. Алматы және Сарыарқа аудандары газбен қамтамасыз етілген. Ал Байқоңыр және Есіл аудандарында жеткізуші газ құбырын (2023 жылы кварталішілік желілер) салу жұмысы жүріп жатыр.

Сондай-ақ Алтай Көлгінов соңғы жылдары елді мекендердің өзінде 250 көше салынып, жөнделгенін тілге тиек етті. «Биыл тағы 70 көшеге асфальт төсейміз, оның негізгі бөлігі аяқталды. Сол сияқты 300-ден астам аула мен қоғамдық кеңістік (саябақтар, гүлзарлар, желекжолдар) абаттандырылды, дене шынықтыру-сауықтыру кешендері, бірқатар оқу орындары салынды. Мемлекет басшысы қаланың шет аймақтарын дамытуға ерекше көңіл бөледі. Біздің мақсатымыз – елді мекендерге қажетті инфрақұрылым жүргізіп, тұрғын үйлер, әлеуметтік нысандар, демалыс орындарын және тағы басқаларды салу» деді елорда әкімі.

### ЕЛЕҢ ЕТКІЗЕР

**Израильдік археологтар елдің оңтүстігіндегі Негев шөлінде көне мешіттің іргетасын тауып алды.**

Мешіт жартылай шеңберлі намаз оқу орны – михрабы бар төртбұрышты шағын бөлме болды. Сондай-ақ мешіттен алыс емес жерде Византия дәуірінен қалған ферма үйі мен ерте ислам дәуірінен қалған қымбат зат табылды. Ғалымдар бұл аймақта христиан дінінен исламға біртіндеп көшудің қалай болғанын жақсырақ түсінуге мүмкіндік беретінін атап өтті.



**Мамандар алғаш рет қуатты лазерлердің көмегімен пластик қалдықтарын нағыз гауһарға айналдыра алды.**

Жер бетінде гауһар тастар сирек кездесетіндігі үшін бағаланады, бірақ басқа планеталық жағдайларда олар тастар сияқты жиі кездеседі. Ғалымдардың пайымдауынша, Уран мен Нептунның мұз алыттары сутегі мен көміртекті экстремалды қысыммен қысып, гауһар тастар жасайды, содан кейін олар атмосфераға жаңбыр ретінде түседі дейді.



**Үндістан мен Қытай коронавирусқа қарсы инесіз екпенің жаңа әдісін мақұлдады.**

Оның бірі мұрынға тамызу арқылы болса, екіншісі ауызбен демалу арқылы болады. Мұрынға арналған вакцинаны Сент-Луистегі Вашингтон университетінің ғалымдары жасаған және кейіннен үнділік вакцина өндіруші Bharat Biotech лицензиясын алған. Компания екі мәрте сынақ өткізді.

## ЖҰМЫЛА КӨТЕРГЕН ЖҮК ЖЕҢІЛ



(Соңы. Басы 1-бетте)

Нұр-Сұлтан қалалық Қазақстан халқы Ассамблеясы қайырымдылық акциясына бастамашы болды. Оған елорданың этномәдени бірлестігінің өкілдері, ҚХА кәсіпкерлер қауымдастығы, Назарбаев университеті Жоғары бизнес мектебі түлектерінің қауымда-

стығы, «Alumni of Nazarbayev University School of business» КЕУ, меценаттар, бизнесмендер және қала тұрғындары атсалысты.

Нұр-Сұлтан қаласы «Достық» үйінде ұйымдастырылған қайырымдылық акциясы барысында өрттен зардап шеккен облыс тұрғындарына 15 миллион теңгеге жуық азық-түлік, төсек-орын

жабдықтары және бірінші кезекте қажетті заттары бар 40 тоннаға жуық гуманитарлық көмек жіберілді.

– Қостанай облысында алапат өрт әрбіріміздің қабырғамызды қайыстырды. Қиын жағдайда қалған отандастарымызды қолдау – азаматтық міндетіміз. Елордадан 8 тонна жүк тиелген алғашқы көмек жексенбі күні кетсе, бүгін тағы 40 тонна жүк тиіп жібердік. Елдің бірлігін көрсететін игілікті іске атсалысуға ниетті азаматтар тағы да қажетті заттарды жинап жатыр, – деп атап өтті қалалық ішкі саясат басқармасының басшысы Дәурен Бадамұратов.

Гуманитарлық көмек өрт шалған аймақтағы тіршілікті қамтамасыз етуге, өртенген үйлер мен инфрақұрылымды қалпына келтіруге бағытталуда.

– ҚХА қостанайлықтардың басына күн туғанда, қарап отыра алмады. Ішкі саясат басқармасымен бірлесіп, Қостанайға көмек көрсетіп жатырмыз, – деп атап өтті ҚХА мүшесі, «Дустик» ҚР өзбектер қауымдастығы төрағасының орынбасары Хасан Шарипов.



## КОЛЛЕДЖ ҰЖЫМЫ ДА КӨМЕКТЕСТІ

Нұр-Сұлтан қаласындағы Жоғары сауда-экономикалық колледжінің оқытушылары мен студенттері, сондай-ақ Amanat партиясының мүшелері бірігіп, Қостанай облысында өрттен зардап шеккен тұрғындарға көмек көрсету үшін қаржы жинау туралы шешім қабылдады.

Игі бастаманы қолдаушылардан 413000 теңге жиналып, бұл қаражатқа зардап шеккендерге тұрмысқа қажетті заттар, азық-түлік алынды.

Акцияға колледж ұжымы да, студенттер де белсенді қатысып, патриоттық, белсенді азаматтық ұстанымдарын көрсетті. Колледжге арнайы келген, Amanat партиясы-

ның саяси істер бөлімінің басшысы Ахмет Сейтов колледж басшылығына, оқытушылар мен студенттерге алғысын білдірді.

Аз уақыттың ішінде жиналған қажетті заттар мен азық-түлік Amanat партиясының көмегімен, тілсіз жаудан зардап шеккен отандастарымызға жол тартты.

## ЖАСТАРҒА ЖІГЕР ҚОСТЫ

Елордалық Азаматтық бастамалар орталығында қаланың үкіметтік емес ұйымдарының өкілдері Мемлекет басшысының Қазақстан халқына Жолдауын талқылады.



Іс-шараға азаматтық қоғам өкілдері, сондай-ақ мемлекеттік органдардың қызметкерлері қатысты.

Қалалық Ішкі саясат басқармасының басшысы Дәурен Бадамұратов Президент Жолдауы қоғамның маңызды проблемаларын шешуге бағытталған іс-шаралар кешені екенін атап өтті.

«Студенттерге жылдық 2-3 пайызбен білім несиесін алуға мүмкіндік беріледі. Бұрын мемлекет оқу үшін қаражат бөледі. Қазір студенттер үшін студенттер ақылы оқыды, оқуын аяқтағаннан кейін болашақ жұмысы есебінен мемлекет алдындағы қарызын төледі. Қазір студенттер үшін жағдай одан да жақсы» деді Дәурен Бадамұратов.

Оның айтуынша, Президенттің бала күтімі бойынша төлем мерзімін 1,5 жасқа дейін арттыру, әйелдердің зейнеткерлік жасын 2028 жылға дейін 61 жасқа дейін сақтау жөніндегі тапсырмасы халық арасында оң шешімін тапты. Әсіресе, бизнесті

жүргізу үшін 2%-бен несие берілетіні қуантады. Бұл – астаналық жастар үшін өте жақсы демеу.

«Қазір Президент Жолдауын талқылағанда, оны мемлекет дамуының трендінен көріп отырмыз. Қазіргі жастар елімізде демографиялық жағдай қарқын алған 2004-2005 жылдары дүниеге келген. Олар жақын арада жоғары оқу орындарын бітіріп, еңбек нарығына шығады. Президент Жолдауда келесі жылы жастар үшін 100 мың қосымша жұмыс орны пайда болатынын мәлімдеді» деді Дәурен Бадамұратов.

«Камеда» қоғамдық қорының басшысы, «Қазақстанның Азаматтық альянсының» ресми өкілі Махаббат Еспенова мемлекетпен бірлесіп қоғамдық маңызы бар жобаларды іске асыру жөнінде бірер мысал айтып берді. Атап айтқанда, ол азаматтық бастамалар орталығының қызметін жоғары бағалады.

«Бұл – азаматтық қоғам институттары мен мемлекетте болып жатқан

оқиғаларға бей-жай қарамайтын белсенділер үшін көпсалалы сервистік қызмет. Егер олар қандай да бір проблеманы шешуді жоспарласа, мақсатымыз – оларды іске асыруға көмектесу. Сонымен қатар, бұл – азаматтық қоғам институттары мен мемлекеттік органдар арасындағы өзара іс-қимылды құру жөніндегі диалог алаңы. Президент өз Жолдауында билік пен қоғам арасындағы тиімді диалогтың қажеттілігін атап өтті. Бұл тұрғыда қоғамдық ұйымдардың рөлі арта түсуде» деді Махаббат Еспенова.

«Қазақстан әйелдері» қауымдастығының президенті Гүлнар Байымбетова Президент Жолдауы мемлекетіміздің дамуындағы жаңа кезең екенін атап өтті.

«Менің ойымша, азаматтық қоғам елдің ең өткір және шұғыл проблемаларын шешуге белсенді араласуы керек. Президент Жолдауында проблемалық тұстарды қамту ауқымдылығы ерекше ұнады» деп атап өтті Гүлнар Байымбетова.

**Бразилияның байырғы халқы үкіметтен тропикалық ормандарды қорғауды күшейтуді талап етіп, Сан-Паулуда шеру өткізді.**

Бұған дейін Гуажахара тайпасынан шыққан бірнеше үндістердің қайтыс болғаны белгілі болды. Олардың біреуі бірнеше оқ жарақатын алды, екіншісін көлік қағып кеткен. Бұл тайпаның ерекшелігі өз аумағын өздері күзетеді, орманды малдан және басқа залал келтірушілерден сақтап, қадағалап отырған.



**Әлемдегі ең ірі болат өндірушілердің бірі ArcelorMittal SA электр қуатының бағасының күрт өсуіне байланысты Германиядағы екі зауытты жабуды жоспарлап отыр.**

Сонымен қатар, компания сұраныстың аздығына байланысты Испаниядағы болат зауытын жабатынын хабарлады. Өткен жылы Германия мен Испанияның екі металлургия зауыты шамамен 3,65 миллион тонна металл өндірді. Жалпы алғанда, кәсіпорын жылына 70 миллион тоннаға жуық болат өндіреді.

## ДАБЫЛ ТҮЙМЕЛІ БІЛЕЗІК

Елордадағы Достық үйінде ерекше қажеттіліктері бар балаларға арналған «ақылды» білезіктерді қолданысқа енгізу жобасы талқыланды.

Талқылауға ішкі саясат басқармасының басшысы Дәурен Бадамұратов, Нұр-Сұлтан қаласы әкімінің кеңесшісі Қарақат Абден, «Астана еріктілері Lider.kz» қоғамдық қозғалысының мүшелері мен мемлекеттік органдардың өкілдері қатысты.

Дөңгелек үстел барысында «Астана еріктілері Lider.kz» қоғамдық қозғалысының өкілдері ерекше қажеттіліктері бар балалар үшін SOS дабылды білезікті енгізуді ұсынды. Бұл білезікті ата-анасы кілтпен

ашып алмаса, бала өз бетімен алып тастай алмайды, бір рет қуаттаса, 24 сағат пайдалануға болады. Балалар көмек қажет қылған жағдайда, дабыл түймесін басып, белгі бере алатын бұл білезік ерекше қажеттілігі бар балалардың қауіпсіздігін қамтамасыз етуге өте қолайлы.

Сарапшылардың пікірінше, болашақта бұл технологияны денсаулығында ақау бар балалар мен осындай білезіктерге мұқтаж ересектер кеңінен пайдалануы мүмкін.

## БАЗАРДАҒЫ БАҒА ҚАНДАЙ?

	Астаналық базар	«Сіле» базары	«Шапағат» базары	Көк базар (Шанхай)
Бірінші сортты бидай ұны	480	475	650	600
Бірінші сортты ұннан пісірілген нан	150	95	140	150
Макарон өнімдері	380	335	380	350
Қарақұмық жармасы	700	910	650	630
Тазартылған күріш	460	440	480	450
Картоп	180	130	125	150
Сәбіз	230	120	140	200
Пияз	240	115	110	230
Қырыққабат	200	90	130	170
Қант	680	1000	600	650
Күнбағыс майы	1100	1147	1050	1000
Сыыр еті	2750	2800	2100	2800
Тауық еті	1650	1600	1580	1700
Пастерленген сүт	400	305	380	380
Айран	450	457	450	400
Сары май	4500	4000	4500	3500
Тауық жұмыртқасы (10 дана)	530	487	450	450
Ас тұзы	100	50	80	100
Сүзбе	1000	900	900	950















## ЕРЕКШЕ БАЛАЛАРҒА – ЕРЕКШЕ ҚОЛДАУ

Ерекше қажеттіліктері бар балалар қоғамның ерекше қолдауын қажет етеді. Өздерін қоршаған ортаның кішкентай бір бөлшегі ретінде сезіну олар үшін аса маңызды. Көптеген орталық пен ұйымның осы мәселеге жіті көңіл бөліп, әлеуметтік сұрақпен айналысуы «ерекше» балалар мен ата-аналарға үміт сыйлайды.

Түрлі диагнозы бар балаларға қол ұшын созып келе жатқан орталықтың бірі де бірегейі – «Бақытты шаңырақ» қоғамдық қоры. Елордада жұмыс істейтін орталық еректер мен балаларға оңалту қызметтерін ұсынады.

Бүгінде «Бақытты шаңырақтың» төрт орталығы бар. Екі жыл бұрын ашылған қор бүгінде ерекше тағдырлары бар 600 отбасының басын қосып отыр. Отбасыларға азық-түлік себеті, білім беру құралдары, кәсіпкерлік негіздеріне тегін оқыту секілді түрлі материал-



дық, әлеуметтік, білім беру және психологиялық көмек көрсетіледі. Сондай-ақ жұмысқа орналасу мүмкіндігі беріледі.

Жуырда ғана ашылған төртінші орталық Рақымжан Қошқарбаев, 60 мекенжайында орналасқан. Бұл елімізде

мүмкіндігі шектеулі балаларға арналған алғашқы оқыту-дамыту орталығы. «Бақытты шаңырақ» қоғамдық қорының қызметкері Сәния Нұрмұханованың айтуынша, орталықтың негізгі ерекшелігі барлық отбасы мүшелерінің біріктіруінде. Яғни, мұнда ата-анаға да, балаға да қызмет көрсетіледі.

– Қордың негізгі міндеті – заңнамалық деңгейде мүмкіндігі шектеулі балалар мен олардың ата-аналарының құқықтарын бекіту. Оған зейнетке шығу мәселесі, тұрғын үй бағдарламалары, ментальді бұзылулары бар балалардың мәселелері және т.б. жатады. Сондай-ақ қоғамда балаларды денсаулығына қарай бөліп

түзету қарастырылған. Логопед, дефектолог, психолог мамандардың оқыту сабақтары мен психологиялық қолдауы ұсынылады. Ата-аналар үшін онлайн түрде үйде отырып, кәсіп бастау бойынша түрлі бағыттағы семинар-тренингтер өткізіледі.

Қызығы, орталықтың барлық қызметкерлері – ерекше балаларды тәрбиелеп отырған, осы орталықтың көмегіне жүгінген ата-аналар. Солардың бірі – орталықтың үйлестіруші маманы Гүлжас Шындәулетова. «Ұлым Омар ДЦП диагнозымен ауырады. Біз осы орталықтан көмек алып жүрміз. Психолог мамандардың кеңесіне жүгінеміз. Орталық мамандары жан-жақты қолдау беруге дайын тұрады» деді жас ана.

Айта кету керек, 2021 жылы қордың белсенді жұмысының нәтижесінде «Бақытты отбасы» бағдарламасымен 4000-ға жуық отбасының тұрғын үй алуға байланысты өтініші мақұлданды.

«Бақытты шаңырақ» қоғамдық қоры Назарбаев университетімен меморандумға қол қойған. Оған сәйкес, оқу орнының студенттері онлайн түрде ерекше балаларға математика мен ағылшын тілі пәндері бойынша сабақ береді. Сондай-ақ Нұр-Сұлтан қаласы әкімдігінің Халықты жұмыспен қамту орталығымен де келісім орнатылған. Мәселен, қазақ тілі мен әдебиеті пәнінің мұғалімі Тоғжан Сәден «Жастар тәжірибесі» бойынша биыл жұмысқа орналасты. «Жас маман, педагогпын. Ерекше қажеттіліктері бар балалармен, олардың ата-аналарымен бірлесіп отырып, балалардың дамуына үлес қосқым келеді» деді мұғалім.

Қоғамдық қордың ұжымы алдағы уақытта инклюзивті білім беруді қолға алмақ. Орталықтың негізгі ұстанымы: балалары бар үй – бақытты шаңырақ.

Индира БЕРЖАНОВА



## ӘРЕКЕТСІЗДІК – МАСЫЛДЫҚҚА ҰРЫНДЫРАДЫ

2022 жылы үкімет әлеуметтік салаға 8,6 триллион теңге бөледі, бұл 2022 жылға арналған бюджет шығыстарының жалпы көлемінің 46 пайызын құрайды, әрі бұрын жоспарланғаннан 581 миллиард теңгеге артық. Мемлекеттің әлеуметтік шығындары жылдан-жылға өсіп келеді, одан түзеліп жатқан халықтың жағдайы шамалы. Ендеше бұл қоғамда тәуелділікті, қарекетсіз масылдықты тудырмай ма деген күмәнді сұрақ туындайды.

Айгүл  
УАИС

Қазақтың «толмас шелекке құйма» деген сөз бұл ретте үкіметтің әлеуметтік саласындағы бағдарламаларына жүрмейтінін белгілі. Өйткені мемлекет өзінің дамуында әлеуметтік мәселерді шешуді алдыңғы орынға қояды.

Әлеуметтік әділеттілік принципіне сәйкес әлеуметтік мемлекет барлық азаматтардың лайықты өмір сүру деңгейін қамтамасыз ету, көмек көрсету мақсатында материалдық игіліктерді өмірдің қиын қыспағында қалғандарға көмек қолын созу міндетті. Мемлекет тарапынан көрсетілетін мұндай қолдау қоғамдағы әлеуметтік шиеленісті төмендету мақсатында да барлық елдерде жүзеге асырылады. Осының аясында мемлекеттік әлеуметтік саясат күші салуда халықты әлеумет-

тік қолдауды ұлғайту, барлық мұқтаж адамдардың күнделікті тұрмысын жеңілдету үшін ең төменгі әлеуметтік стандарттарын ұсына алады. Бірақ осы деңгейде қалып қоймай, биікке ұмтылып, мемлекетке тәуелді болмаудың жолын қарастыру механизмі неге қатар айтылмайды?

Азаматтарды өзін-өзі қамтамасыз етуге ынталандырудың және бейімдеудің көптеген мемлекеттік әдістері іске қосылмаса, елде масылдық қалыпты жағдай ретінде халық санасында орнығып қалуы мүмкін. Оның салдары қалыпты құбылыс болып қалмақ. Бұл ретте әлеуметтік масылдықтың санамызға мықтап бекуінен сақтанғанмыз жөн болар. Ел ішінде шын мұқтаждар емес, «алған үстінен ала берсем» дейтін пиғылдылар қаптап келеді. Шын мұқтаждар қайта қымсынып,



кабинеттердің есігін ашып, тепсініп талап етпей, ізденуге тартынып тұрады. Мемлекеттің әлеуметтік саясатының теріс салдары осыған жеткізетінін мойындау керек. Әрине, жетім мен жесірді, мүгедектер мен көпбалалы аналарды тағы

басқа қоғамның аз қамтылған топтарын ойлағанда, масылдық туралы айтуға да ауыз бармайды. Бірақ, біршама түсініксіз, түпсіз шелекке су құйғандай, халықтың қуатын арттыруға емес, қарекетсіз масылдыққа ұрындыратын бұл құбылыс-

ты қалай реттеуге болады? Жоғарыда аталған санаттағы адамдардың ішінде де қаласа қарды жандыратын, тауды қопаратындар жоқ емес қой. Шын мұқтаждардан бөлек, «масылдылық» адамның жеңіл жолмен жеткен азықты талғау

етіп, одан артығына қол жеткізуге оның жолында барлық күшімен ауыр еңбек болса да тартынбауға, игіліктерге ұмтылысын жояды.

Оның ар жағында ақылы мен қайратына сенбеген соң, «паразиттік» сана билейді. Ол өмір салтына айналып, қоғам есебінен қолайлы өмір сүруді ойлайды. Бірақ әлеуметтік көмектің деңгейі ешқашан қандай бір мемлекетте болсын, қазақша айтқанда ұшпаққа жеткізбейді. Адам өзінің күш-жігерімен ғана сол жақсылыққа жетеді.

Айтармыз, масылдықты қалыпты әлеуметтік құбылыс деп санауға болмайтынын, оның адамзаттың дамуын шектейтін, қалыпты жағдайдан ауытқуы болып табылатынын түсіну керек.

Мемлекеттен дәмектен дұрыс, алайда бұл дегеніңіз ерік-жігеріңізді матап, құрдымға бастайтынын білген жөн. Игіліктерге маңдай теріңіз жеткісі келетін, масыл болудан арланбайтындар жоқ емес. Алайда барынша, жағдай жасап, олардың осындай қыспақтан шығуына күш жұмсап, барлық мүмкіндікті соған құйса, бәлкім, кедейі жоқ елге айналып, нағыз әлеуметтік қоғамды құрармыз.

Соңғы күндері елімізде орман өрті үдеп тұр. Ең алдымен, Қостанай облысының Әуликөл ауданына қарасты орманды алқаптан басталған бұл өрт бүгінгі күнде Жетісу жеріне дейін жетіп, Шығыс Қазақстанды да шарпыды. Таң қаларлық жағдай.

Қалиакбар  
ҮСЕМХАНҰЛЫ

Әуликөл ауданындағы орманның бір уақытта бірнеше алқабынан қатар жанып, оған қоса Қостанай қаласындағы қару-жарақ дүкеніне де өрт кеткенде жұрт арасында «бұл өрт қасақана жасалған қастандық емес пе?» деген күмән пайда болды. Іле-шала Мемлекет басшысы Қасым-Жомарт Тоқаевтың Қостанай облысының өртті сөндіру жөніндегі жедел штаб отырысын өткізген кездегі «Қостанайдағы өрт 4 аудан аумағына жайылды, тағы 5 облыста – Ақтөбе, Түркістан, Қарағанды, Шығыс Қазақстан, Ақмолада өрт ошақтары пайда болды» деген мәлімдемесі мен ҚР төтенше жағдайлар министрі Юрий Ильиннің «Өрт қасақана адам қолынан болды деген нұсқаны жоққа шығармаймыз» деген сөзі күмәнімді тіпті күшейтті. Енді, міне, бірде Ақмола облысының Зеренді ауданындағы орманды алқаптан өрт шықса, 6 қыркүйек күні Алматының іргесіндегі, Алатаудың бөктеріндегі орманның жалаңданып жатырғанын орануы, Шығыс Қазақстан облысына қарасты Марқакөл маңындағы маң даланың өртенуі... бұл реткі өрттің тегін емес екенін шындырап аңғартқандай. Найзағай түсіп, тосыннан өрт кетті дейтін себеп айтуға да келмейтін ашық күнде аяқ астынан орманды алқаптардың бірінен кейін бірі өртенуі түсініксіз.

Елімізде орман қорының жалпы ауданы 30,4 млн гектар. Бірақ Қазақстанда орманды алқаптың көлемі ел аумағының небәрі 4,6 пайызын құрайды. Есесіне шөл және шөлейт жерлер Қазақстанның 56 пайызын алып жатыр.

#### «ЖАСЫЛ БЕЛДЕУ» ЕЛОРДАНЫҢ «ӨКПЕСІ»

Елімізде орманның өсуі де әрқелкі. Кейбір облыстарда сыңсыған сұлу орман жоқ. Климатымыз әр алуан, топырақ жағдайы да әртүрлі. Демек, Қазақ мемлекетінің алдында тұрған бір үлкен міндет бар. Ол – табиғи ормандарды қорғап, ағаш егіп, орман отырғызу; шөлейттенудің алдын алып, жасанды орман белдеуін үздіксіз ұлғайту. Осы тұрғыдан алғанда, «Астананың жасыл белдеуін қалыптастыру» мақсатында елорда төңірегіне 100 мың гектарға жуық аумаққа орман отырғызылғаны – қуанарлық жағдай. Осы орман белдеуінің қалыптасуымен, астананың ақырған аязының да беті қайтып, бораны бәсейді. «Жасыл белдеу» – Қазақстан Республикасының 1997 жылдан



## ОРМАНЫ БАРДЫҢ – ҚОРҒАНЫ БАР

бастап жүзеге асырып келе жатқан, астананың іші мен оның маңайындағы аймақтарды абаттандыру жобасы. Қаланың өзінде және оған жапсарлас аумақтарда жасыл желек қалыптастыру және оны сақтау мақсатында елорда айналасын қоршай бой көтерген жасыл белдеу бұл күнде қаланың таза ауамен тыныстауына мүмкіндік беретін «өкпесіне» айналды. Бұл орманды алқапта 10 миллионнан астам ағаш пен 2 миллионға жуық бұта бар. Демек, орман – далаға сән беретін, тіршілікке нәр беретін бағалы байлық ғана емес, климаттың өзгерісіне де оң ықпал ететін, сондай-ақ ел қорғанысына да қалқан болатын қасиетті қорған. Міне, сол қорғанымыздың ай мен күннің аманында шетінен отқа оранып, жалынға жалманғаны жанға батады.

#### ӘЛЕМДЕ ОРМАН АЗАЙЫП БАРАДЫ

Жасыл шардағы орман қорының жалпы аумағы 32 пайызды құрайды. Бұл ормандар, негізінен, Оңтүстік Америкада, Ресейде, Орталық Африкада және Оңтүстік-Шығыс Азияда шоғырланған. Бұл төрт өңірдегі орман әлемдегі орманның 60 пайызын құрайды, әсіресе Ресей, Бразилия, Индонезия және Конго Демократиялық Республикасы әлемдегі орманға ең бай елдер саналады, себебі әлемдегі орманның 40 пайызы осы 4 елге шоғырланған.

БҰҰ-ның Қоршаған ортаны қорғау басқармасы адамзаттың кесірінен жәһандағы орманның жартысына жуығы жойылып кеткен деген деректі алға тартады. БҰҰ Азық-түлік және ауылшаруашылық ұйымының

2001 жылғы есебіне сүйенсек, әлемдегі орман алқабы 1990 жылғы 3,96 миллиард гектардан 2000 жылы 3,87 миллиард гектарға дейін азайған. Демек, жыл сайын әлемде неше жүз мың гектар орман жойылып кетіп жатыр. Осыған байланысты кейбір елдер табиғи орманды өз елінің құнды байлығы, ұлттық қоры ретінде бағалауды заңмен кепілдендірген.

#### ӨРТ АПАТЫ – ЕҢ АУЫР БОЛҒАН ЖЫЛ

Қазақстан да соңғы жылдары орман отырғызу жұмысына ден қойғанымен, табиғи ормандар жыл сайын өртке оранып, көлемі азайып барады. Мәселен, 2011 жылы сол кездегі Оңтүстік Қазақстан облысына қарасты Боралдай орман шаруашылығында 4000 гектарға жуық орман өртеніп кеткен.


2013 жылы Түркістанда 600 гектарға жуық тоғай күлге айналса, келесі жылы Арыс қаласында 200 гектар орман өртке оранды. 2014 жылы ел бойынша 500 гектарға жуық орман апатқа ұшырап, өрт себебі белгісіз күйде қалды. 2015 жылы шырайлы шығыстың сәні болған Марқакөл маңында өрт кетіп 900 гектар орман жанып кетті. Бұл өткен он жылдықтағы ең ірі өрт апаты болса, 2021 жылғы 10 мамырда Шығыс Қазақстан облысы Риддер қаласы маңындағы орманға өрт кетіп, 272,4 гектар орман қызыл жалынның құлқынына түсті. Төтенше жағдайлар министрінің мәліметінше, 2021 жылдың бірінші жартыжылдығында Қазақстанда 500-ге жуық орман өрті тіркеліп, салдарынан 38 мың 27 гектар жер өртенген (2020 жылы – 22 мың 626 гектар, бір жылда плюс 68%) болса, биыл жыл басынан бері 800-ге жуық орман өрті тіркелген. Тек қана Қостанай облысындағы өртте 43 мың гектар орман өртке оранды. Демек, биылғы жыл Қазақстандағы өрт апаты ең ауыр болған жыл болып тұр.

#### ЖАЛАҚЫ АЗ, ӨРТ КӨП...

Қазақстанда мейлі қай өңірде, қайсы аймақта өрт апаты болса да, оның нақты себебі анықталмай, жұмбақ күйде қалып жатады. «Күннің ыстығы», «найзағайдың түсуі», «орман қорғаушылардың немқұрайдылығы» деген сияқты себептер айтыла-айтыла жауыр болуға

айналды. Өрт болған кезде қылмыстық іс қозғалады да, өрт сөнген соң, ол да «өшеді». Сосын да шығар, бізде жыл сайын орман өрті үзілмейді. Кінәліні тауып, қатаң жаза-ламаған соң, орманшылар да өртке немқұрайды қарайтын деңгейге жетті. Өйткені көптеген өңірлерде, әсіресе табиғи орман алқаптарында өрт қауіпсіздік шаралары сақталмайды. Алда-жалда өрт туыла қалса, оны қалай ауыздықтаймыз деген мәселеге мән берілмегендіктен, көп өңірлерде өрт туыла сала дереу ауыздықталмайды.

Оның үстіне, Қазақстандағы өрт сөндіру техникаларының



көбі ескі, өрт сөндіруге қолайлы тікұшақтар саны аз. Таулы өңірлерге доңғалақты көліктер бара алмайтындықтан, өртті өшіруге адам күшіне таянуға тура келеді. Өткен жылы тамыз айында Төтенше жағдайлар министрілігі 48 млрд теңгеге өрт сөндіру техникасын сатып алуды жоспарлап отырғанын жариялаған болатын. Алайда біз аталған министрліктің баспасөз қызметіне хабарласқанымызда, өрт сөндіру техникасын сатып алу бойынша 2021-2023 жылдарға арналған Жол картасы бекітілгенін, Жол картасы аясында республикалық бюджет есебінен 387 бірлік автокөлік құралын сатып алу жоспарланғанын атап өтті (2021ж. – 134 бірлік, 2022 ж. – 127 бірлік, 2023 ж. – 126 бірлік).

Алайда, 2021 жылы республикалық бюджет есебінен



қаражат бөлінбей, өткен жылы ешқандай техника сатып алынбаған. Ал биыл өрт сөндіру қызметтеріне 146 бірлік өрт сөндіру-құтқару техникасы сатып алынған. «Қазір Министрліктің әуе паркінде әртүрлі типтегі 132 тікұшақ бар. Өрт сөндіру қызметтерінің иелігінде әртүрлі санаттағы 3321 бірлік өрт сөндіру-құтқару техникасы бар. Бүгінде жаңартуды қажет ететін техниканы есепке алғанда, қосымша 944 өрт сөндіру техникасын сатып алу қажет» деп түсіндірді ТЖМ баспасөз қызметі. Демек, орманды өрттен қорғайтын мекемелердің техникаларының 20 пайыздан астамы ескі. Қостанайдағы өрт кезінде өрт сөндіру машиналарының дұрыс жұмыс істемей, су құбырлары жарылып жатқаны жайлы ақпараттардың тарауы да тегін емес.

«Өрттің көбеюінің бірқанша түрлі себебі бар» дейді аты-жөнін, жұмыс орнын жазбауымды өткізген мәлім бір орман шаруашылық мекемесінің бастығы. «Біріншіден, жұрттың өрттен сақтану сәуясы төмен. Орман арасында демалады да, жаққан отын толық өшірмей кетеді. Екіншіден, қазіргі шылымдар оңай өшпейді. Бұл – өртке себеп болатын адами факторлар. Жаратылыстық себептер де аз емес» дейді ол.

– Ең бастысы, орман шаруашылық мекемелерінде қызметкер жетіспейді. Себебі жалақы

төмен, 75 мың теңге жалақымен қайтып күн көреді?! Бұл – бір. Екіншіден, техникаларымыз қаусап тұр. Бұрын 7 жылда бір жаңалайтын, ал қазір 10 жылда жаңалау міндеттелген. Оның өзі атқарылмай қалады. Берген тікұшақтары су шашуға қабілетсіз. Үшіншіден, орман қарауылдары жаяу жүр. Бұрын мотоцикл берілетін, қазір ол да жоқ. Тау ішінде өрт болса, жедел жетудің өзі мұң, – дейді орман шаруашылығы мекемесінің бастығы.

Әрине, бұдан сырт, жұрт арасындағы әңгімелерге қарағанда, Қазақстанда орманнан ағаш, отын алу үшін жасыл желекке әдейі өрт қоятын қаскөйлер де бар көрінеді. Тіпті олар орманшылармен астасып та алатын сыңайлы. Өйткені біздің елде орман өртегендерге берілетін жаза тым ауыр емес, 8 жылға ғана сотталады.

Қысқасы, орманды қорғау – әрбір азаматтың борышы. Өйткені ол тіршіліктің қормалы, елдің қорғаны. Сондықтан орман өртінен сақтануға мемлекеттік деңгейде баса назар аудару керек. Бүкіл елді жайлаған жемқорлық бұл салада да жоқ емес болуы мүмкін. Ол да – ескеретін мәселе. Әсіресе, орманшылардың жалақысын көтеру кезек күттірмейтін міндет. Себебі өзі аш құрсақ, бала-шағамды қалай бағам деп уайымдап жүрген адам орман күзетіп те жарытпайды.



